

四庫全書

集部

欽定四庫全書

明詩綜卷八十九

翰林院檢討朱彝尊編

梵琦 三十首

梵琦字楚石小字曇曜象山人居海鹽天寧寺  
明初徵至京建法會賜座第一有北游鳳山西

齋三集

靜志居詩話楚石僧中龍象筆有慧力淨土詩  
累百可以無譏和寒山拾得豐干韻亦屬游戲

讀其北游一集風土物候畢寫無遺志在新奇  
初無定則假令唐代縹流見之猶當矐乎退舍  
矐癡可癡權輩乎愚菴智及輓章云麻襪直上  
黃金殿鐵錫時敲白下門誦之足以豪矣當日  
孝陵所賜絮裘及鉢至今尚存海  
鹽天寧寺中即上人所築西齋也

擬陶

新蟬何處來鳴我高槐陰流水欲入屋好風自開襟牀  
頭一束書壁上三尺琴琴以散哀樂書以通古今所幸  
車馬稀非邀里人欽虛名如北斗有酒不能斟縱洗爰  
居耳寧知鐘鼓音

西津

月滿潮來盛  
天空野望低  
樹侵吳甸北  
帆入楚江西  
俊鵲秋方下  
慈烏曉更啼  
即看霜露及  
風景已淒淒

贈江南故人

黃荑羹羊酪  
看山駐馬樞  
地椒真小草  
芭欖有奇花  
塞月宵沉海  
邊風晝起沙  
登高望吳越  
極目是雲霞

上都

四首

突厥逢唐盛  
完顏與宋鄰  
君王饒戰畧  
公主再和親  
異

域車書會中天雨露均皇朝真一統御歷正三辰  
塞外疑無地人間別有天宮牆倚樹直御榻愛花偏正  
想爐熏滿遙知漏點傳輪臺方奉詔版築更求賢

夜斗低垂地秋河近著城有灰開月暈無扇減風聲角  
奏梅花早杯傳竹葉清尚衣綿欲折高殿雪初晴

萬國初無外諸羌更在西閣門朝見雪亭障晚開韓天  
子黃龍府將軍白馬氏錦袍涼似水銀甕醉如泥

開平書事

六首

射虎南山下看羊北海邊築城侵地斷居室與天連墨  
黑沾衣雨沙黃種黍田自從為帝里無復少人烟  
地勢斜臨北河流穩向東龍庭行萬里虎路遶三峻羌  
女裁皮服奚兒挽角弓長吟對落景獨坐感飛蓬

舊俗便弓馬新霜稱綺羅平原芳草歇古戍暮雲多翠  
袖調鸚鵡金鞭制駱駝上樓看月得無酒奈君何  
北海何人到西天此路通尋經舍衛國避暑醴泉宮盛  
夏不揮扇平時常起風遙瞻仙仗簇復有綵雲籠

夜雪沙陀部春風勅勒川生涯惟釀黍樂事在彈弦不  
用臨城將何須負郭田雙鵬來海外一箭落天邊

孤城橫落日一望暗銷魂天大纖雲卷風多積草翻有  
田稀種粟無樹強名村土屋難安寢飛沙夜擊門

漠北懷古

十首

世祖起沙漠臨軒銷甲兵羌中一片地秦後幾長城象  
膽隨時轉駝蹄入夜明何須待秋獵不必問春耕

曠野多遺骨前朝數用兵烽連都護府柵遠可敦城健

鵲雲間落妖狐塞下鳴却因班定遠牽動故鄉情

北向無城郭遙遙接大荒舊來聞漢土前去是河隍野  
蒜根含水沙蔥葉負霜何人鳴戍篲使我涕霑裳

無樹可黃落有臺如白登三冬掘野鼠萬騎上河冰土  
厚不為井民淳猶結繩令人思太古極目眇平陵

吾聞窮髮北此地即天涯夏有九河凍春無三月花清  
涼非枕簟富貴是雲沙愛爾捐居室長年到處家

曠望重關外蕭條萬里餘未嘗營粒食終不好樓居謬



甚英雄事茫然草昧初大人饒畜牧隨分有穹廬

漢使騎高馬唐兵出近關前臨蒲類海却上浚稽山帝  
號垂千古軍聲蓋百蠻初無功可紀只有劒須殷

每厭冰霜苦長尋水草居控弦隨地獵剗木近河漁馬  
酒茶相似駝裘錦不如健兒雙眼碧慣讀左行書

北入窮荒野人如曠古時天山新有作耶律晚能詩地  
圻河流大峰高月上遲自言羊可種不信繭成絲

遠客停驂處平沙落日時塞蓬穿土早河柳得春遲欲

乳羊求母頻嘶馬顧兒朔方多雨雪南望是京師

烏桓

烏桓第一州白雲亂三秋不盡邊雲起無情塞水流  
兔銛蒙氏筆狐潔檜君裘自笑成癡坐何期作遠遊

黑谷

北去終無極南還未有期猶嫌江路遠不與土風宜  
晚翠看盧橘春香憶楚葵茲山吾可老飲水噉棠梨

當山即事

水草頻移徙烹庖稱有無肉多惟飼犬人少只防狐白  
毳千縑氎清尊一味酥豪家足羊馬不羨水田租

曉過西湖

船上見月如可呼愛之且復留斯須青山倒影水連郭  
白藕作花香滿湖仙林寺遠鐘已動靈隱塢高燈欲無  
西風吹人不得寐坐聽魚蟹翻菰蒲

贈王使君

君持使節過繩橋已遣蠻方感聖朝良將未誇班定遠

大臣猶數蓋寬饒川香野馬銜青草雪暗天鵝避阜鵬  
西出陽關九千里歸來莫惜鬢蕭蕭

燕京 二首

高昌王子出京師手把春風軟柳枝贈與臨洮遠行客  
雲沙漠漠見何時

西山水落甕山浮無數人煙簇上頭好種荷花三十頃  
中間更著采蓮舟

宗泐 三十七首

宗泐字季潭臨海人洪武初舉高行沙門居首

命住天界寺尋往西域求遺經還授左善世有

全室集

徐大章云季潭學博才瓌詩不論於枯寂在江湖則其言蕭散悠遠適行住坐

卧之情在山林則其言幽夏簡澹得風泉雲月之趣在殊方異域則其言慨而不激直而不肆

極山川之險易風俗之熾惡其詩衆體具矣朱伯賢云泐公識地高邁調趣清古風度悠揚

昂然若霜晨老鶴聲聞九皋澹乎若清廟朱絃曲終三歎王達善云潭公詩章渾涵汪洋千

象萬狀而一以理為主顧玄言云泐公博遠古雅詩從陶韋集中來當代弘秀之宗也

詩話洪武十四年六月開設僧錄司掌天下釋教事曰善世曰闡教曰講經曰覺義左右各一

員府設僧綱司都綱有副州設僧正司僧正縣  
設僧會司僧會明年四月以戒資為左善世宗  
泐為右善世智輝為左闡教仲義為右闡教玘  
太朴為左講經守仁為右講經來復為左覺義  
宗宅為右覺義先是九年春孝陵幸天界泐公  
住持斯寺賞其識儒書知禮義命畜髭髮髮長  
數寸矣欲授以官固辭帝親作免官詔時宋學  
士景濂好佛帝目為宋和尚泐公好儒帝呼以  
泐秀才嘗奉詔製讚佛樂章帝嘉歎賜和平日  
所作詩晚奉旨佚老歸鳳陽之槎峰帝降書曰  
寂寞觀明月逍遙對白雲汝其往哉其後僧智  
聰坐胡惟庸黨詞連泐及來復謂泐西域取經  
惟庸令說土番舉兵為外應有司奏當大辟詔  
免死孝陵御頒清教錄僧徒坐胡黨者六十四  
人咸服上刑惟泐得宥蓋受主知者深矣止菴  
讀其西游集賦詩云一字一寸珠一言一尺玉

其推重

若此

雜詩

三首

我自來涇川星歲已再周  
託茲山水勝謂可成遲留  
奈何物外牽撫事心悠悠  
久知世道惡奚事仍夸猶  
璫林有奇鶴未嘗識羅寧  
翩然覓靈鳳接翅崑崙丘

夜久無與適塊然坐空堂  
白鳥一何多營營來我傍  
靜言聊假寐遂以襲單裳  
嗜膚猶可忍聒耳諒難當  
晨星耀東廡明月墮西廂  
念爾能幾何滅跡於朝陽

落葉委通衢紛然無人掃但覩新行迹不見舊時道古  
木倚道旁亂藤絡其杪歲暮雖青青終非本容好世人  
懷往途悟此苦不早振衣無後期來從漢陰老

送裕上人歸天台

我家赤城東不識華頂嶠遠道送君歸昨夜夢中到崖  
泓有泉瓢竹室留茶竈珍重山中人拂衣願同調

冬夜憶清遠道初二兄

夜深霜氣寒窗月皎如燭鳴鴻尚遐征孤鶴亦驚宿念



我平生親悵焉連心曲四明是何處苕溪如在目異方  
詎能通遠道何由縮十年無一字嗣音如金玉白髮漸  
欺人晤言安可卜

辛亥新歲程處士見過常熟別墅臨別賦詩

獻歲春未迴風雨連十日荒村少朋驩窮巷絕人跡程  
君汎扁舟茅齋破幽寂遠來見真情疑言忘永夕顧惟  
艱難際出處各有役世紛日相纏誰能念疇昔因君尚  
道誼臨別增太息獨棹去茫茫空瞻海虞碧

暮過賞溪

日暮衆鳥歸孤雲亦還山市人爭渡息小舟沙際閒我  
屋西峰下半出青林間鐘聲連深念無為尚塵寰

答夏景瞻

昔居賞溪曲詠迫靡所侵衲衣挂石壁燕坐長松陰子  
來慰幽寂語念相知深孤雲十年別明月千里心而我  
亦何事投迹此禪林向來結茅地回首空青岑寧知江  
海遠遇子復在今百挫志矯矯猶能發狂吟清辭入古

調一鼓熏風琴吁嗟衆響作過耳無留音

出峽圖

瞿塘水如馬五月不可下兩舟何處來披圖一驚詫前行稍超平勢若閒暇者後來方履險衆篙不停把巖迴古木披峽束哀湍瀉嗟爾駕舟人安危在操舍

雨花臺送客

梁日雨花臺近在城南陌不見講經人空林澹秋色登高俯大江目送千里客白鳥下滄波孤帆遠山碧

焦山寺鑑師臨江軒

一峰如鉅石屹立江水中寶剎蔚崇構勢與山爭雄若  
人於此住超然塵外蹤開軒當水面下瞰馮夷宮魚龍  
近几席波濤蕩襟胃有時天宇淨倒影清若空燕坐觀  
衆有起滅殊無窮一念寂不動嗒焉心境融焦先邈千  
載遺丹射林紅浩歌倚闌夕明月生海東

送瑄上人

揚舲下大江江寒欲飛雪高帆天際遙獨鴈雲邊沒煙

波渺何之倏忽成楚越遂令白首人年華感消歇

不羈行贈吳客

倜儻不偶世落魄江海游雖來京國久不謁公與侯仙  
人五城高彩雲十二樓天街看明月一身風露秋翩然  
下揚子棹歌發吳謳太湖三萬頃鳬鴈中沉浮且作拍  
浪兒赤脚坐船頭笑指闔閭墓千古成荒丘

墨竹行

平生不識雲心子墨妙通神有如此眼中何處修竹林

湘水邊頭煙雨裏長林蔽虧天為陰鷓鴣啼斷江沉沉  
六月南風晝不熱人家住在叢篁深九疑山帶蒼梧野  
翩翩帝子雲中下鳳鸞飛舞虯龍驤羽葆毵毳堪把  
我昔曾行賞溪曲兩岸波光漾寒綠萬玉森森一徑遙  
溪口清陰到山麓今朝看圖政自憐畫圖身世俱茫然  
雲心骨化丹陽土吁嗟墨妙何人傳

短歌寄魏仲遠

夏蓋湖吞上虞浦魏君家在湖邊住岸花磴草幾春秋

白鳥滄波自朝暮知君愛客仍好奇畫船載酒如漢陂  
擢歌中流日將夕璧月湧出青琉璃嗟哉隱居端有道  
世上無如閒處好王充遺蹟尚可尋賀老風流良不少  
去年聽詔來京國識君臉紅頭半白別懷空與水東流  
海燕江鴻斷消息今朝聞有東州船尺書欲寄心茫然  
福源精舍地最偏安得與君湖上相周旋

賦一曲亭送趙本初待制致仕歸越

鑑湖一曲亭猶在風物十年長不改賀公去後趙公來

山水無情若相待當時季真得賜歸黃冠未必全忘機  
爭侶今朝玉堂老還鄉仍著宮錦衣鑑湖水闊吞平野  
酒船直到亭堦下荷華晚日照尊罍揚柳春風拂簷瓦

題天童萬松圖

小白市太白峰二十里松居其中一徑陰陰翠羽蓋半  
空竄竄蒼髯龍太白之峰分九隴壯哉千古之佛宮香  
雲不動梵唄合樓閣倒影清池空左菴昔年此說法山  
谷答響撞鉦鐘只今九重城裏住夢魂夜夜鄞江東錢



塘有客曰王蒙為君寫此千萬松座間慘慘起陰霧屋  
底颼颼生清風何來禪子松下度長衫大笠攜一筇亦  
有緇徒三四公青林路口衣裳紅我初展卷欲大叫海  
上湧出高龍嵒雲端縹緲下玉童有路似與天相通自  
憐平生不一到吁嗟老矣將焉從還君此圖袖手坐有  
目只送南飛鴻

聽泉軒為藏無盡作

若人有耳唯聽泉泉聲入耳長涓涓穿林出澗度妙曲

萬古不斷冰絲弦此聲不來耳不往中自寂然遺外響  
青燈照壁夜沉沉獨倚軒窗月東上

送瀾法師歸雲門

故山從此去何日更相逢獨倚千峰閣閒聽六寺鐘石  
牀流水繞羅逕落花封會有東歸興來尋雲外蹤

故涇縣徐典史挽歌

白髮神仙吏黃塵八十齡竟同華表鶴俄失老人星甕  
盡牀頭酒埃生案上經今朝來哭處墓草未全青

與徐伯廉再往南陵

又向南陵去復攜良友同人煙千嶂裏客路百花中雉  
雛初晴日鷺啼滿樹風漸知精舍近清磬出林東

登多景樓

水際一峰出飛樓倚沱寒煙雲連北土風物見南朝山  
勢臨淮盡江聲入海消偶來閒眺客憑檻興偏饒

送王叔潤

平涼來又去官滿復之官塞晚黃雲合邊秋白草寒有

儲諸將喜無訟遠人安萬里關山月吟詩獨自看

登相國寺樓

冬日大梁城郊原四望平雲開太行碧霜落蔡河清欲  
問征西路兼懷弔古情夷門名尚在無處覓侯嬴

發扶風

曉發扶風縣雲低欲雪時長河王莽寺獨樹馬超祠營  
窟炊煙早牛車度坂遲非熊無復夢渭水自逶迤

過鳳翔

驅車過鳳翔驛路入汧陽地接戎羌遠山連蜀隴長平  
岡秋樹綠重谷晚風涼明日關山道登高望帝鄉

到河州

自發烏思國於今數月過雪中臨黑水冰上渡黃河裘  
覺青貂敝經煩白馬馱玉關生得入定遠喜偏多

和徐大章登南天竺山樓韻

徐君為愛南竺幽登此塢口之飛樓鄉山數點海東際  
客路十年湖上頭澗泉脩脩落靜夜風葉浙浙吹高秋

便當倚檻和新作為報主人須少留

錢塘懷古

欲識錢塘王氣徂紫宸宮殿入青蕪朔方鐵騎飛天塹  
師相樓船宿裏湖白鴈不知南國破青山還傍海門孤  
百年又見城池改多少英雄屈壯圖

偶作一首

新作方池水未平晚晴獨自繞池行好花都向雨中盡  
幽鳥忽來林外鳴科斗黑時初種藕鴨頭綠處欲生萍

匡山舊業閒料理更結茅亭此計成

偶作次王以中韻

拄笏高人塘外居作詩直與古人如偶從荷芰香邊得  
閒向簞簞節上書白露濕堦涼氣早青燈照壁雨聲疎  
曉來不署金吾事帶劒承明去直廬

湘皋煙雨圖

翠袖湘江曲秋林淚點斑冥冥煙雨裏不見九疑山

次白以中西塘即景

落日雞鳴埭何人射雉回北湖山月上相送暮鐘來

山中小景

四山一片秋色埜客獨坐茅亭渡頭紅葉如雨石上長松自青

送人歸南昌

紅顏綠髮映春袍三十年前白下橋亂後重逢天竺寺相看如夢說前朝

秋塘小景



西風昨夜到南塘楊柳蒹葭色轉蒼飛鳥獨來荷柄立  
不教涼露滿蓮房

觀吾子行別仇山村詩作絕句弔之

子行詩云劉伶一鎬事徒

然胡蝶飛來別有天欲語太玄何處問西泠西畔斷橋邊

吹簫人去竹房空海內猶憐翰墨工最是西泠橋畔路  
淡煙疎柳夕陽中

來復九首

來復字見心自號竺曇叟豐城人元季航海至

鄴止定水寺洪武初召至京太祖覽其詩褒美  
賜金襴袈裟授僧錄司左覺義詔住鳳陽圓通  
院坐胡黨凌遲死有蒲菴澹游二集

顧玄言云復公富於

題咏并多感慨所乏幽淨

詩話蒲菴與全室齊名然不及全室遠甚蓋全室風骨成削而蒲菴未免癡肥也

### 胡侍郎所藏會稽王冕梅花圖

會稽王冕雙頰顴愛梅自號梅花仙豪來寫遍羅浮雪  
千樹脫巾大叫成花顙有時百金閒買東山屐有時一

壺獨酌西湖船暮校梅花譜朝誦梅花篇水邊籬落見  
孤韻恍然悟得華光禪我昔識公蓬萊古城下臥雲草  
閣秋瀟灑短衣迎客嬾梳頭只把梅花索高價不數楊  
補之每評湯叔雅筆精妙奪造化神坐使良工盡驚詫  
平生放蕩禮法疎開口每欲談孫吳一日騎牛入燕市  
真目怪殺黃髯胡地老天荒公已死留得清名傳畫史  
南宮侍郎鐵石腸愛公梅花入骨髓示我萬玉圖繁花  
爛無比香度禹陵風影落鏡湖水開圖看花良可吁咸

平樹老無遺株詩魂有些招不返高風誰起孤山逋

赤壁圖為胡允中賦

江空水落寒無波倚天赤壁高嵯峨雪堂老蘇從二客  
攜酒夜載扁舟過中流扣舷發櫂歌有酒不飲當如何  
鰕魚三尺鱸白雪臨風細酌金叵羅酒酣耳熱歌再起  
直遡空明三百里一聲孤鶴橫江來明月在天天在水  
酌月呼嫦娥仰天聽天語洞簫吹徹廣寒秋却挾飛仙  
共高舉人生行樂須及時昨日少壯今日衰功名自昔

等炊黍英雄徒為曹瞞悲畫史獨何心丹青託千載江  
雲山月想登臨彷彿圖中見風采後來游賞豈乏賢文  
章不如元祐前萬金詞賦爛星斗追逐騷雅光聯翩先  
生別去陵谷遷漠漠宇宙迷荒煙臨皋鶴夢骨可仙誰  
同此樂消閒年

游石湖蘭若 二首

荷花蕩西湖水深上有蘭若當高岑客吟時見猿鳥下  
僧定不聞鐘磬音雨香秋林橘子熟雲落空磻棠梨陰

閒來掃石坐竹裏靜與山人論素心

五龍之峰雲作屏雙崖削出芙蓉青何人磴裏拾瑤草  
有客松間尋茯苓林風不驚虎卧石山雨忽來龍聽經  
吳王臺榭今寂寞秋香薜荔花冥冥

次韻王敏文待制燕京雜詠

南風吹到運糧船萬斛香粳倍上年傳敕漕臺添氣力  
賜金多辦太平筵

鵲綠微生太液波芙蓉楊柳受風多日長供奉傳新譜

教舞天魔隊子歌

秋滿龍沙草已霜射鵬風急朔雲長  
內官連日無宣喚  
獵取黃羊進尚方

西湖雜詩二首

芙蓉灣口綠陰斜吹笛何人隔彩霞  
驚起沙頭雙翠羽  
銜魚飛上刺桐花

流觴亭子鳳山阿都護行春小隊過  
笑擲金錢花底醉  
玉簪彈出白翎歌

守仁

二十八首

守仁字一初號夢觀富陽人四明延慶寺僧住  
持靈隱洪武中徵授僧錄司右講經升右善世  
有夢觀集

詩話明初詩僧有二南洲一溫州人名文藻一  
山陰人名博洽有二無言一越人名明德一不  
知何許人名至訥夢觀道人亦有二一晉江人  
名大圭一富陽人名守仁石倉曹氏乃誤合為  
一仁公詩諸體皆合有云盡拋身外無窮事遍  
讀人間未見書可謂有志者也相傳南粵貢翁  
翠仁公進詩云見說炎州進翠衣網羅一日遍  
東西羽毛亦足為身累那得秋林靜處飛太祖



怒曰汝謂我法網密不欲任我耶幾不獲免按此詩不載集中當出好事者附會使誠有之必不敢進呈也

待月軒為式藏主作

月出青松林照我松下戶牀前光未滿裴回更延佇蓮漏下初更綠煙散東塢浩歌步中庭衣露濕如雨

秋夕病中

夕雲斂中天月出萬象正九野聲影消平湖湛寒鏡驚風著露草栖螢光不定嘗新感時物金氣颯已應扶羸

捲前幔銷肌怯虛靜憂來復就枕蕭條發孤詠

題錢選畫

太華青蓮高千仞苔壁古招提隔層雲孤逕入深塢鐘  
鳴谷口風木落溪上雨何處夜猿啼歸帆下秋浦

弘上人蓄秋山圖

萬峰霜晴翠如洗峰底行雲度流水西北高樓爽氣邊  
江南落木秋聲裏蒹葭潮長魚在梁白鷗飛盡天茫茫  
松根丈人讀書處時有疎鐘來上方仙槎影沒銀漢遠

木末芙蓉為誰剪何處涼風送客船歸來似是東曹掾  
東曹頗笑未識機挂帆直待鱸魚肥山川搖落已如此  
不信草露沾人衣平生畫手不可遇坐閱新圖得真趣  
題詩寄與沃州僧吾亦買山從此去

題方方壺畫

方壺老人年九十醉把金壺傾墨汁染得蓬萊左股青  
煙霧空濛樹猶濕危橋過客徐徐行白石下見溪流清  
仙家樓館在何處雲中彷彿聞雞聲古苔蒼蒼煙景暮

藥草春深滿山路招取吹笙兩玉童我欲凌風從此去

題趙希遠畫蟠松玉兔圖子昂趙公鑑記

天水王孫重豪素愛寫蟠根萬年樹上有徂徠五色雲  
下有中山雙白兔清陰散作秋滿林咫尺高堂起煙霧  
丹桂吹香野菊黃玉葉金枝亂無數迢迢錦水泛蒼鳬  
漠漠青天飛雪鷺人間畫手非不多自是王孫得真趣  
浮玉山人列仙侶雅與王孫同出處妙畫題來字字真  
兵後收藏乃奇遇宣和遺譜世莫傳艮岳荒涼風景暮

眼中人事已非前畫裏山川尚如故老我披圖一愴然  
落日長歌弔南渡

金山寺

神禹開天塹中流碣石存蓬萊分左股灩澦失孤根  
驛騎催官渡風帆拂寺門甕城燈火近鐘鼓報黃昏

寄鐵厓先生

先生謝客居東里使者傳宣拜下牀樂府謾推梁子範  
禮經須問魯高堂酒須捫馬來光祿賦到龍旗說太常

賜老鑑湖猶有待山陰茅屋未淒涼

答倪元鎮

禪榻清談屢有期  
茶煙想見鬢絲垂  
春風水榭停蘭漿  
夜雨何山寫竹枝  
甲煎沉香都入夢  
新蒲細柳總堪悲  
鷓鴣飛處重相憶  
擬和樊川五字詩

過張侯舊宅

畫戟門開宿草新一過此地一沾巾  
歸來燕子驚新主  
開到梨花又暮春  
雨榻無因連海曲  
星槎何處泊天津

夢中相見猶平昔  
翻訝傳來信未真

題耕隱為王子安作

讀殘書卷雨聲稀  
耕破春雲晚色微  
瓦缶自傾蒼水酒  
金貂不換綠蓑衣  
江花未落秧針短  
隴草初深繭粟肥  
翻笑義熙陶縣令  
田園荒後始知歸

次韻沈文舉忽見梅花

看梅曾感故園情  
每到開時別恨生  
舊樹已從兵後盡  
新枝忽見水邊橫  
夢迴山閣梨雲白  
月滿江城畫角清

欲寄西湖早春信  
楚天霜冷雁無聲

題畫

積雨平原煙樹重  
翠厓千丈削芙蓉  
招提更在秋雲外  
只許行人聽曉鐘

懷友

湖草青青上客舟  
辛夷花老麥初秋  
一春多少懷人夢  
半在鄉山雨外樓

題柯博士竹



元統才人總寂寥奎章遺墨尚風標鈞天夢落江南遠  
腸斷雲中紫玉簫

風雨歸莊圖

濕雲漲斷隔溪山依約茅堂碧樹間好是鏡湖秋雨裏  
陸家莊下載書還

書珉上人壁

五年一度見西崑舊雨來人半不存只有高梧三十本  
春風依舊長兒孫

題杜少陵像

關山雲冷笛聲秋一曲南征感舊游  
滿地月明雙鬢雪  
斷腸今夜望鄜州

陳檜

吳楓楚柳逐煙空陳檜依然護梵宮  
可惜禎明歌舞地  
後庭無樹著秋風

蘆子渡

百里晴沙江水長蘆花風起碧天涼  
客舟會泊西城下

滿地砧聲兩岸霜

万金一首

万

一作力

金字西白吳人元末住持瑞光寺洪武

初召入禁庭奏對稱旨總持法會事住天界寺  
有澹泊齋藁

乙巳清明泊舟柳胥浦

柳胥浦上綠楊邊客裏清明繫客船  
莫遣桃花作紅雨  
且看榆火散青煙  
笙歌漫說承平日  
耕稼深期大有年

邂逅農人且相慰軍儲無限望吳天

夷簡一首

夷簡字易道號同菴宜興人住持杭州淨慈寺  
又主南京天界寺除僧錄左善世

鍾山法會詩

千騎東華玉輦來春官詔許五王陪近臣共說天顏喜  
收得秘櫬樹子回

詩話洪武四年冬十有二月詔徵江南高僧十  
人詣京師命欽天監筮日就鍾山太平興國禪

寺建法會以薦國殤恭屬御製文宣諭天下禁  
屠宰明年春正月辛酉昧爽帝服皮弁臨奉天  
前殿以表授禮部尚書陶凱出午門鼓吹前導  
至寺用梵法白而焚之癸亥帝指圭面佛初奏  
善世之曲再奏昭信之曲三奏延慈之曲舞以  
應節四奏法喜之曲五奏禪悅之曲夜半六奏  
徧應之曲徹旦七奏善成之曲諸樂章皆出宗  
泐所撰勅僧寶金施摩伽陀斛法食十高僧者  
宗泐來復梵跣守仁万金清潘曇噩慧日居頂  
及夷簡也建會之日天雨杪攤子於山中次日  
有詔皇太子諸王同觀故夷簡詩及之清潘字  
天淵居頂字玄極俱黃巖人潘徵授右覺義頂  
亦徵授僧錄司慧日號東溟住天竺山曇噩字  
無夢主國清寺噩題華頂云山翠濕衣晴亦雨  
并華寒齒夏猶冰曹娥江云去越王城三十里  
到曹娥渡八分潮詩頗磊落惜無全篇合格者

良琦三首

良琦字元璞吳人住天平山之龍門又主樵李

興聖寺

楊廉夫云琦公既究禪理兼通儒學能詩其餘技耳

七月既望玉山草堂分韻得爽字

草堂涼夜延清賞石徑楓林秋颯爽鄰屋不同南北院  
稻畦真似東西瀼彈琴石上風生衣載酒船來月蕩槳  
青山自與白雲期莫遣移文謝來往

月浦道中

江似三巴曲星隨獨樹斜客行猶轉柁秋盡尚迷家白  
漲寒沙霧紅生曙海霞故人驚會面老大惜年華

口占

柳陰新月上銀盤入坐清輝落酒寒莫把閒情聽絡緯  
露華已濕玉闌干

法智一首

法智吳山僧

過安慶弔余忠宣公

浮屠高出暮雲低，雉堞遙連碧樹齊。  
茅屋人家兵火後，樓船輦鼓夕陽西。  
大江千里水東去，明月一天烏夜啼。  
欲酹忠魂荒冢外，白楊秋色轉淒迷。

詩話：余忠宣輓詩，方外作者四人，非空、惠恕、祖敏、法智。惟法智詩為佳。

廷俊

二首

廷俊字用章，號懶菴，鄱陽人。

一云樂平人。

至正末主

西湖淨慈寺洪武元年示寂於鍾山，有泊川集。

送僧歸洞庭



每憶華山寺高居俯洞庭煙中飛鳥白波面亂峰青賈  
舶朝依岸禪房夜不扃最憐霜後橘金子爛熳熒

有渡

有渡方舟小無家道路長大荒天渺渺滄海日茫茫水  
母浮還沒風鴛出復藏不須寒雁叫客意已淒涼

懷渭 二首

懷渭字清遠南昌人洪武初奉詔至鍾山退居

錢塘有竹菴外集

送一初上人遊武林

舞鳳飛龍若箇邊天涯送遠獨淒然江山南渡降王宅  
風雨西陵過客船蹋雪馬塍春買樹鬪茶龍井夜分泉  
落花寂寞東歸日煙嶼冥冥叫杜鵑

寫扇贈明上人

太湖六月暑氣微龍宮佛屋相因依蜃嘘翠霧作樓閣  
蛟織冰綃鳴杼機鐘磬無時空外發笙簫幾處月中歸  
投閒擬向上方住共看滄波白鳥飛

克新三首

克新字仲銘自號江左外史鄱陽人元末住嘉興水西寺洪武初召至南京奉詔往西域招諭吐蕃有雪廬南詢藁

初至檣李

通越門中逢故人爽溪橋上送餘春燕飛官巷桃花老  
鶯囀江亭楊柳新行李風塵千里道緼袍天地百年身  
未聞淮海休兵甲回首關山一損神

次韻方推官感興

鴛湖風雨曉吹晴野曠天高秋氣清鳳詔早頒南國使  
龍旗新動朔方兵闔河千里民初息吳越三年賦始輕  
戮力邦家戡禍難釣灘何處濯吾纓

西湖景

蘇子隄邊楊柳春湖中簫鼓畫船新誰知歌舞繁華地  
回首東風戰後塵

自悅一首

自悅號白雲天台人居餘姚之燭溪洪武初徵  
至南京賜歸住杭州靈隱寺

續蘭亭會補任城呂系詩

崇阿撫神秘微風扇和淳靈雨既云沐品彙區以陳蘭  
茗擢中沚葩萼媚芳辰散懷得真契引觴答熙春

福報一首

福報字復原臨海人住四明智門寺洪武初被

召賜還

續蘭亭會補彭城曹諲詩

柔條扇微風輕波漾晴旭羣彥此委蛇鳴條集中谷列  
席依巖隈飛觴隨水曲緬懷古先哲庶以繼遐躅

如阜一首

如阜字物元餘姚明真院僧洪武初徵至南京  
卒於天界寺

詩話物元居雪秘山自營精舍宋元逸述其略  
云吾鄉雪秘山物元人所營有軒曰入翠曰  
逍遙有室曰觀樹有蓬曰雪蓬有閣曰怡雲曰  
西閣西閣之前有隙地植茶曰苦茶原植薇曰

紫微坡曰離卉林曰芭蕉亭閣之右偏有大沼  
瀦山泉而溢實垣下入溝溝廣四尺泉流紺而  
潔經閣前不絕通溝植蓮有小木梁跨其上曰  
白蓮港港之前有地可遊息曰琅玕塢塢之左  
偏有小屋可宴坐曰桐陰舍其流循舍下注石  
竇以出而瀦於垣外曰白鷺池其曲曰鵲鵲灣  
鵲閣池館皆曲盡其妙當元之季隱居之士多  
治園亭結文酒之社方外自師子林外若阜公  
者可稱好事矣

續蘭亭會補任城令呂本詩

楔飲秘圖湖天氣淑且柔傳觴祭曲渚濯纓臨芳洲纖  
條亂風樹幽葩落晴溝衆賓亦以樂正忘塵世憂





明詩綜卷八十九

欽定四庫全書

集部

明詩綜卷

九十一

詳校官中書

臣

涂日煥

主事銜臣徐以坤覆勘

總校官降調編修

臣

倉聖脉

校對官庶吉士

臣

潘曾起

謄錄監生

臣

楊

恪

欽定四庫全書

明詩綜卷九十

翰林院檢討朱彝尊編

德祥二十五首

德祥字麟洲號止菴錢塘人洪武中住持徑山

有桐嶼詩集

靜志居詩話止菴詩原出東野意主崛竒而能  
儼才就格足與楚石李潭巾鉶塵坻鼎立桑門  
蒲菴以下要非其敵姚恭靖祥老草書歌云祥  
師只今為巨擘上與閑素爭嶠屹錢塘山水甲

天下秀氣毓子為靈檀十年不出筆成冢中山  
老兔愁難安晴軒小試烏玉玦雙龍隨手掀波  
瀾昨將一紙遠寄我天孫機錦千花攢頰師勿  
置鐵門限從他需索來熱官縉紳相與歎莫及  
便欲奪去加巾冠然則止  
菴之草書更妙絕時人矣

車碌碌

車碌碌上山遲下山速前車行後車促後車不管前車  
覆前車已覆無奈何後車碌碌何其多

芍藥

春去若亡國寸紅不可容一朝兩朝雨三夕五夕風萬

物不一色無以全其功芍藥是何本落在夏庭中

月夕看梅

梅花夜開香滿溪溪上月出風淒淒開門出溪看花去  
落花流水無東西枝間月落且歸去明日看花還杖藜

送僧東游

坐罷南山夏東游思浩然與雲秋別寺同月夜行船一  
路鐘聲裏千峰落木前西來有祖意不在普通年

九月八日旅中夜懷

秋運花爭發寒燈客自傷別家將一歲明日又重陽鄉  
俗誰同與詩情老未忘涼風舊池沼蕭瑟芰荷香

旅寓

九月尚絺衣故鄉胡不歸塞鴻聲一到江樹葉都飛路  
晚逢僧少門寒過客稀自慚蘧伯玉又是一年非

晏起

宿雨何由歇春眠不肯醒燕來猶舊戶花落自空庭引  
水平魚沼燒香繞硯屏齋中無別事閒寫幾翻經

秋塘

獨步秋塘上其如客思何  
蟬聲送風葉鳥影度涼波  
草店三家酒菱船一道歌  
不堪回首處楊柳夕陽多

小築

日涉東園上余將卜此居  
草生橋斷處花落燕來初  
避俗何求僻容身不願餘  
堂成三畝地祇有一車書

剪燭

風處搖金蛹煙時閃墨鴉  
寸心終不昧雙淚欲橫斜  
漸

過分詩刻虛開報喜花剪聲初落指滿席散春霞

聽雨有懷

灑樹聲兼雪捎簷力借風每來寒夜後多在客愁中草  
意閒門共燈情白髮同之人天一角的的似高鴻

夜歸寄東田隱士

觸熱嫌尋訪閉門如路窮手持東野集思與何人同候  
雨坐欄樹聽蟬得晚風因之過林叟歸步月明中

新秋有懷



得秋才一日秋意已紛紛涼覺水邊早聲先樹裏聞高  
僧在西嶺短策不離雲我欲尋行跡恐驚鷺鶴羣

題海雲寺

香刹住中流初疑地若浮路從沙際入帆到樹邊收清  
磬敲漁夜新書報橘秋洞庭西在望欲去更遲留

題鎮海樓

斯樓屢易名一上一傷情白屋多為戍青山半作城雨  
中春樹出風裏晚潮生亦有歸鴉早閒啼四五聲

登富春永安寺

栗葉邨前石子溪青山一掩路渾迷也知谷裏多猿鳥  
未信雲中有犬雞滿耳只聞諸澗響回頭方覺衆峰低  
平生傾想今朝到願結茅茨在寺西

與姪自京還橫塘故居

桑麻田在水邨中千里歸來共阿戎春水野航天上下  
石橋林木岸西東階除點火兒童喜兄弟開門語笑同  
二載客塵如夢事明朝溪上看飛鴻

過湖州

平生只想住湖州  
僻性迂情可自由  
一片水聲中倚杖  
幾重山色裏行舟  
東林書卷貧猶買  
西塞綸竿老未收  
緩得歸程過寒食  
杏花村雨聽鳴鳩

喜友過新居

柴門不向小溪開  
西阜山多稱不才  
拄杖前村新雨後  
故人東郭買舟來  
山瓢遠慰何多幸  
竹筵相逢第一迴  
從此熟來溪上路  
莫教行迹有莓苔

古懷

思尋海底人為乞珊瑚樹持栽此庭前顏色長不故

答香光居士

山北山南住雞聲隔一峰新詩忽寄到猶勝一相逢

許起宗見過

雨氣來山北茶香過竹西芙蓉花發處明日約扶藜

橫塘寺

抄羅園裏好僧坊兵火年來事可傷白髮老人知舊跡

繞塘樓子十三房

題明辯之畫春江聽雨圖

歸來雙鬢各蕭然見畫猶能記昔年風雨一船曾泊處  
借人燈火草堂前

題網魚圖

溪頭三月雨昏昏落盡桃花水正渾網得魚多滿家喜  
賣時應不到城門

妙聲十二首

妙聲字九臯吳縣人居常熟慧日寺洪武初被  
召蒞天下僧教有東臯錄

雨

密雲起崇朝飛雨灑高閣蕭瑟傍松檐  
逶迤帶煙郭坐來池水深吟罷林花落  
已知禾黍秋不奈衣裳薄

送沈行恕

挾策事行邁言往五湖濱陰風結山岳  
落葉滿河津之子忽已遠我懷將焉陳  
志士惜白日行客念蕭晨况茲

艱難際奪我心所親中情苟不移在遠猶比鄰毋為離  
別苦庶以道自珍

水仙詠

百草秋盡死孤花麗巖阿芳心太皎潔歲事成蹉跎微  
月步遙夜輕風生素波懷人豈無意路遠欲如何

題高尚書九江暑雨圖

尚書畫山山籠從九江秀色開森聳况當五月暑雨交  
雲氣涵勃川光動五峰削出青如蓮綠樹仿佛聞吟猿

猶瞻謝眺青山宅不見米家書畫船何人出門面山立  
頭上烏紗翠痕濕誰喚山東李謫仙來觀瀑布三千尺  
於今戈戟亂如麻使我披圖一永嗟欲買沃洲歸共隱  
江山如此屬誰家

新墳行

南山崔嵬青入雲將軍取山新作墳方春迫民就工役  
路上白日無行人西家舊墳雙石馬一日驅來華表下  
東家翁仲今尚存一朝移來在墓門葬期日薄云最吉



雞鳴而作夜不息新墳已成舊墳毀舊鬼銜冤新鬼喜  
新墳舊墳無了期南山崔嵬終不移

題商德符山水

左山畫山延祐初山如何其佳有餘飛泉高挂白蝦蟇  
奇峰爛發青芙蓉直疑齊東華不注又似塞北醫無閭  
嗟哉好手不復得藏弄貴比英瓊琚

題焦元尚山水

淮陽先生愛畫山下筆萬里須臾間既開金剎依寥廓

亦有綠樹臨潺湲竹間鳥啼春雨歇洞口花落晴雲閒  
知君高志在丘壑著我溪橋相往還

游石湖

近聞移居湖水頭蘭若下瞰滄波流獼猴夜偷錫杖去  
鷗鳥日傍闌干浮揚州月照五湖白洞庭木落三山秋  
相望只隔半江水安得贈之雙佩鉤

苦雨懷東臯草堂寄如仲愚

四月淫雨寒淒迷邊軍夜歸聞鼓輦大麥漂流小麥黑

富家歎息貧家啼書囊留滯北山北草堂故在西枝西  
焚香掃地蚤閉戶莫遣袈裟沾燕泥

發金陵

大船浮江江水清中流蕩槳駕鵝鳴楚雲無情自西去  
吳山不斷來相迎坐依北斗近人白卧見河漢當空橫  
舟中有客且勿語聽我竹枝歌月明

東臯雜興

三高祠西湖水東浦口水與長橋通人言此中可避世

來結茅齋如已公

題畫

目極江南有所思  
餘不風雨落花時  
錢郎應恨春歸盡  
獨倚東風寫折枝

至仁二首

至仁字行中  
自稱熙怡叟  
番禺人  
元末住紹興  
崇報寺  
洪武初  
主虎丘寺  
有澹居橐

詩話澹居橐為饒州路總管府判官  
皇甫琮廷玉所編  
僧克新序之  
嘗撰楚石行狀  
有云浙水

東西被召者十有六人余與西齋琦公夢堂龜  
公與焉則詩雖刊行於至正中而實登明初之  
法席者也

吳越兩山亭為尹本中縣尹賦

蕭然大夫新作亭吳山越山相對青天目雲霞耀西浙  
石帆風雨來東溟王霸英雄何足數句踐夫差兩抔土  
喜君亂後蘇蒼生白晝彈琴如單父

送厚元載遊會稽

江上楊花落孤帆度遠汀潮連滄海白山擁會稽青內

史籠鵝帖仙人放鶴亭登臨有新製母惜寄林局

元靜二首

元靜字天鏡

一云字天覺

號樸隱會稽人自稱會稽

山樵洪武中召至南京乞歸主靈隱寺羅禍謫  
戍陝西有樸園集

重九二首

舊日重陽節唯尋麴米春忽經時到眼但覺老隨人白  
髮雖多難黃花不厭貧登高本無意蹤跡媿紅塵

故舊俱淪喪，人情轉寂寥。  
馳驅逢九日，牢落是今朝。  
把菊難為醉，囊萸興自消。  
江鄉獨無賴，風雨暗蕭蕭。

清澹一首

清澹字蘭江，天台人。居天界寺。晚主松江東禪。

寺有望雲集

西湖曉行

海角曛曛日欲生，山南山北淡煙橫。  
春風吹斷沙禽夢，人在綠楊堤上行。

溥洽一首

溥洽字南洲山陰人上天竺僧洪武中為僧錄

司右講經歷左善世尋以讓道衍居右遭讒左

遷右覺義久之復右善世有雨軒集

潘次耕云遜國之事

因洽公之繫獄而疑其開剝猶曰君子可欺以其方也因從亡致身諸錄而行程歲月一一以

虛者實之難罔以非其道矣

詩話遜國之事國史太略野史過詳終成疑案程濟梁由玉等未必有其人史仲彬官翰林未必有其事與其惑於從亡致身諸錄無寧信鄭端簡今言所述矣



題山深草堂次王適齋韻

聞說平夷堡高居絕徼山牽蘿秋補屋伐竹曉開關  
款塞烽煙靜歸田士卒閒都門回首處頻喜寄書還

普莊一首

普莊字敬中仙居人洪武中被召入天界寺歸  
住徑山示寂於撫州

詩話莊公自號呆菴作歌云呆菴呆道人  
不識世間秋與春無榮無辱無疎親讚亦不喜罵不  
嗔雖以自訟其矜詡也多矣

追和歸源老祖山謠

長林悉凋落刮地霜風吹道人不出山終年無所知一  
心既空寂萬法將焉依海門明月上冷照枯松枝

至道一首

至道字物外臨海人住無錫之嵩山寺洪武中  
被召尋乞還有夢室集

流翠亭

道人性沉静置屋層巒間四檐山溜瀉萬壑松濤翻清

秋爽氣集落日衆鳥還過客坐來久寂寥誰叩關

如蘭 三首

如蘭字古春富陽人住持天竺寺永樂初召校  
鐫經律論三藏有支離集

詩話古春與夢觀同游東維子之門東維子有  
送二上人歸三竺序其略云余在富春得山中  
兩生曰蘭曰仁授之以春秋兵興潛於釋然皆  
用世之才夢觀為孝陵尊禮古春晚出嘗識于  
忠肅於彌月時亦  
別古崖之流也

琴清為胡若思教諭作

微颺灑練衣空庭夜寥泚涼葉生露華澄江上新月沖襟澹無營孤桐絃白雪天秋萬籟鳴霜清百泉咽冥鴻度湘雲威鳳出丹穴至音聽者稀幽思自超越悵然一長吟烏啼漏聲徹

殊別峰習靜卷

疾雷破山嶽大風揚波濤百川相蕩滴萬竅爭怒號道人聞自性六窗鎖猿猱喧寂兩忘念月出中林高

曉發

東風卷雨曉雲收  
兩岸雞聲送客舟  
柔櫓不驚沙上雁  
殘燈猶照驛邊樓  
天連野水浮空闊  
斗轉銀河拂地流  
遙望吳城何處是  
青山數點落長洲

懷讓一首

懷讓字不虛  
天童寺僧

尋竹隱寺

聞鐘識寺遙  
小徑緣雲入  
日暮下山歸  
秋衣不知濕

善學一首

善學號古庭吳人出家大覺寺元末主崑山薦  
福明初居光福以寺僧輸賦違期徙贛州行至

馬當山示疾而卒有詩集

毛子晉云古庭長於  
五言如雲起猿聲斷

松高鶴夢危人疑天上坐鷗訝鏡中飛垣倒夜  
奔鹿草深秋聚蛇殿空空鳥入樹老引藤纏今  
元遺山見之  
應解頤也

宿晚村

眺望前村近桑麻路欲迷過田衣拂水緣徑屨沾泥遠  
嶠寒煙合空林夕照低村翁留我宿也解說禪栖

自恢二首

自恢字復初一作元南昌人洪武初住廬山

偶成

金沙溪上柳條齊  
白鳥羣飛落照低  
十里荷花紅勝錦  
好山多在畫橋西

題唐子華畫山水

江雲如雪樹高低  
竹裏人家傍水西  
滿地松陰春雨過  
好山青侶若耶溪

無愠一首

無愠字恕中號空室臨海人出家徑山主明州  
之靈巖再主台州之瑞巖忽謝事入松巖日本  
來聘被召至闕下以老病辭留天界寺尋還鄞  
之翠山

松巖襍言

山中十日九日雨樹頭青子落不住白犬尋蹤入草間  
驚起竹雞飛上樹



智圓一首

智圓字鑑中錢塘人住寶幢寺

送僧還四明

遠移瓶錫秣陵城又逐秋風過四明白石清泉尋舊約  
碧雲紅樹動離情路從朱雀橋邊去舟自丹陽郭裏行  
惆悵客中頻送客更堪疎柳暮蟬聲

大本一首

大本字宅衡會稽僧徑山書記

送徐行正人材之京

鴻鴈來時澤國秋  
西風潮落大江頭  
蒹葭楊柳東西岸  
楓葉蘆花遠近洲  
鐘阜煙霞千嶂出  
蓬萊宮闕五雲浮  
丈夫勲業青冥上  
莫為鄉思易動愁

大圭一首

大圭字恒白晉江人泉州開元寺僧有夢觀集

詩話恒白語法侶云不讀東魯書不知西來意  
此逃墨歸儒之言也嘗題山居云山色宜茅屋  
松風滿鉢盂湖中泛月云偶臨湖坐  
得嘉樹欲傍花行無小船均饒風致

夏日同許氏兄弟遊龜山

山有大石下有歐陽詹讀書遺址

閒情素乖俗樂彼中林居林居未云果幽賞意有餘出  
郭多青山佳木亦扶疎並游得良友方駕從所如翠微  
薄炎景蘿風汎涼裾雲逕步窈窕石門入清虛少留席  
豐草綠縟綿以舒叢柯翳鳴鳥石澗清游魚形神一蕭  
散疲勩亦已祛路緣龜巖東遂即歐陽廬懷賢仰高躅  
撫蹟驚廢墟願留石中室畢誦人間書茲焉恐遲暮眷  
眷空躊躇

淨圭一首

淨圭住磧里

游仙詩

縹緲仙山五色雲  
玉真飛佩度氤氲  
不應名字題仙籍  
猶著唐家舊賜裾

德珉二首

德珉字伯貞號石窗  
洪熙間虎丘寺僧  
後居徑

山

秋懷

江潭葉落鴈初飛，又見涼風到客衣。  
日下浮雲迷北望，天涯孤棹滯東歸。  
驚看秋草流年換，夢憶青山故舊稀。  
明日一竿滄海去，白鷗應笑未忘機。

晚泊東湖有懷姚醉雲

水晚雲陰思渺茫，若為孤棹泊橫塘。  
夢回明月人何遠，愁對殘燈夜更长。  
別渚沙寒移宿鴈，疎林葉響墮微霜。  
明朝有約新豐道，載酒重過舊草堂。

善啟一首

善啟字東白號曉菴長洲人主蘇州永定寺尋  
主松江延慶寺授僧綱司副都綱預修永樂大  
典有江行唱和詩集

詩話曉菴早負詩名錢唐瞿宗吉賦牡丹詩師  
與對壘用一韻賦百首獨菴南洲交器重之嘗  
被召纂修永樂大典書成告歸與上竺完公敬  
修北禪瑾公如珪白蓮車公指南舟中倡和有  
江行詩一卷王汝玉序之按大典共二萬二千  
九百卷疑編纂之不易而敬修詩云昔出當嚴  
冬茲還及春暖蓋不過數月事爾考當日賜鈔  
者二千一百六十九人則因編纂者多宜成書

之速  
矣

十四日歸舟分韻

江黑饒煙嵐咫尺景難了  
臨發棹還停復恐天未曉  
恍然陰翳開日出雲漢表  
旋吳地匪遙辭闕境云杳  
客愁忽若遺吟緒自縈繞  
坐久望東南斜陽獨歸鳥

大同二首

大同字妙止會稽人  
鄞縣延慶寺僧預修永樂  
大典

詩話妙止詩格未

高然已脫蔬筍氣

### 懷友

谷風淒已厲習習吹我襟微煙襲芳樹細雨沾高林雖  
有一尊酒對此誰共斟迢迢故人遠矧隔瑤華音安得  
駕黃鵠往論古與今緬懷思方續白日苦西沉

### 江邨夕照圖

江村水國幽雲樹半含秋落日曬漁網涼風吹客舟香  
杭黃早刈碩果熟先收官稅供輸外民歌樂未休



懷瑾一首

懷瑾字如珪蘇州北禪寺僧又住嘉定保寧寺  
為僧綱司都綱預修永樂大典

江行分韻

南徐百里近邦畿水滿春江一棹歸回首金焦在何許  
落霞紅處白鷗飛

淨倫二首

淨倫字大巍昆明人正統中出家天順間叅善

學於浮山晚住錫五臺示寂於京師顯通寺有

竹室集

詩話竹室不以詩名往往饒中晚唐風韻五言  
如松皮山舍小石子野溪彎雨苔迷石徑山氣  
冷龕燈七言如晴疊青山芳沼上冷懸紅日畫  
樓西半竿落日孤城遠千里分沙一水流到岸  
舟橫流水曲尋溪路入落花藤樹頭落子銜松  
鼠崖畔飛霜叫竹雞原上燒痕初過雨隄邊新  
柳未拖泥黃茅恰好三間屋赤米看  
收數畝田亦可入李和父弘秀集也

次喬武庫縉金山勝覽韻

妙高臺上昔年遊想徧山中景物幽出洞白雲含海曙

映窗晴雪湛江流  
好音常聽樹頭鳥  
相對不飛沙際鷗  
西望金陵千古意  
蔥蔥佳氣帝王州

古佛巖

蒼松蟠古巖  
洞門鎖幽谷  
但逢掃葉僧  
不見銜花鹿

玄穆一首

玄穆淮陽僧

題焦山寺

獅子峰前放晚叅  
直登絕頂縱幽探  
帆檣遠近迷蒼靄

樓閣高低鎖翠嵐水色倒涵天上下山形雄壓地東南  
焦先去後巖扉古樹老碧桃春正酣

詩話天順中鎮江同知府事常山張春命焦山  
寺僧弘慧輯寺中題詠止存宗泐二首及此詩

寶明 三首

寶明號月舟吳人治平寺僧

楊君謙云月舟詩  
能遠塵字亦清媚

貧而好客客至  
則罄資飲之

次沈陶菴題石田有竹莊韻

東林煙月舊松蘿無復君來對酒歌千葉芭蕉萬竿竹

相思一夜雨聲多

游山舟中作

舟過橫塘酒再沽  
行厨烹出四腮鱸  
好山都在西南上  
一路推篷看畫圖

戲題

拆了鞦韆院宇空  
絲絲楊柳自春風  
薔薇不為人拘束  
却過鄰家屋上紅

恩銓一首

恩鏐字古田號友雲成化間蘇州嘉定護國寺  
僧有集

送張逸人

棟子花開香雨晴乍逢還別若為情不知流水將人意  
送過南沙第幾程

明秀十首

明秀字雪江自號石門子海鹽人祝髮天寧寺  
晚居錢塘勝果山有雪江集

釋冬谿云石門秀  
禪師以詩名海上

游心驚精力追唐雅鄭少谷  
孫太白諸名流多所稱許

詩話王伯安謫龍場驛丞雪江送以詩云蠻煙  
瘦馬經山驛瘴雨寒雞夢早朝一時傳誦之斯  
未為警策特以清越勝耳觀其遺集三卷流轉  
跌宕不失清江靈一之遺音臨終偈云一夜小  
牀前燈花雨中結我欲照浮生一  
笑浮生滅亦彼法中所謂解脫者

### 田叟贈朱可麓

早起飯牛犢落花春水渾雨中青箬笠溪上白雲村食  
力古莘野全生今鹿門不知城府外何處有桃源

### 汎舟至桐口

路轉青村合山連赤岸斜夕陽飛燕子  
茆屋落桐花晚  
野聞孤笛輕舟閣淺沙前峰望不遠  
林暝欲棲鴉

送陳墨山還吳淞兼柬胡秋田

五茸城外月不見十年餘顧我曾遊地  
因君得寄書津  
亭然夜火江市鱸魚若見秋田叟還  
勞問起居

日暮

西閣日將夕川原生暮煙遠林歸倦鳥  
枯葉抱寒蟬野  
岸漁罾外秋風戍壘前故人應念我  
定有尺書傳



楚江秋曉次石田翁韻

山川搖落露華晞野寺鳴鐘破曙暉千里人烟江郭靜  
數聲漁笛水禽飛寒催刀尺風霜早日遠關河信息稀  
叢菊又開身在客長沙誰念未成衣

懷孫太白山人

堦前黃葉堆欲滿湖上白雲閒自來千里秋風悲斷鴈  
兩峰寒日憶登臺未能明月同移棹想見黃花獨舉杯  
吟遍長松千萬樹南屏落日寺門開

勝果山中懷朱陳二翁

西閣暮鐘雲氣陰  
南山秋色故宮深  
半巖落日照江雨  
萬里長風吹桂林  
喜見燈花頻入夢  
病憐物色獨闌心  
青天兩夜負明月  
黃葉思君祇自吟

雨中柬金近山

春雨黯黯芳事微  
經旬獨掩西巖扉  
花枝欲動寒仍勒  
燕子初來濕不飛  
歲月豈知愁換鬢  
江山徒有泪沾衣  
病夫起坐正憶汝  
混世隨聲同是非

訪夏雲山

雲山老翁住南村抱病十日不出門留客細傾若下酒  
遣懷閒弄膝前孫深林四月筍成竹古屋百年槐露根  
鄉曲別來無限意白頭相對意忘言

西巖夏日

密盤春雨中筍味殊勝肉數日不窺園南風吹作竹

普泰三首

普泰字魯山陝西人住京師興隆寺有棲閒集

何仲默云魯山曠懷磊落善談世務不獨能演其教其詩亦皆自得

詩話魯山初見賞於楊君謙復見稱於李獻吉詩名籍甚然卑卑無甚高調

秋晴

幾日豆花雨  
茲晨方見晴  
寒蟬依樹響  
秋蘚上階生  
山脫雲尤翠  
池涵日更明  
西風催萬戶  
都作搗衣聲

寄楊君謙

都下聞歸鴈  
江東憶故人  
高山千里夢  
芳草十年春  
吟苦先催老  
心安却耐貧  
吳門他日過  
書院許誰鄰

足獻吉秋風南北路相別寺門前之句

身世本如寄去留俱灑然秋風南北路相別寺門前

永瑛二首

永瑛字含章號石林海鹽天寧寺僧有石林集

釋冬谿云石林禪餘景興意會朗吟自若其詩  
意到詞發類多率爾而幽沖暇豫自足陶寫蓋  
適其適而不  
適人之適者

山居志感

嘉蔬植我園好鳥巢我樹樹枯鳥驚棲園荒蔬委路寒

氣肅山林新芳颯然故物理有固然於何起欣惡

秋浦

白露下蒹葭秋汀尚有花數峰迴晚色一鴈落寒沙  
熟供炊具鱸肥上釣槎月明吹笛去隔水是漁家

丈漚

四首

丈漚字秋江海鹽天寧寺僧有蘆葦亭橐

詩話秋江詩亦清徹可云筆非秋而  
垂露嘗輯江海羣英集行世者也

送王景仙

碧梧秋晚葉皆稀何事行人又遠違  
落日天涯千里別  
西風江上片帆歸  
山城月出聞猿嘯  
候館霜清見鴈飛  
此後定知難會面  
想思惟有淚沾衣

江上

江頭落日明江上  
西風起歲歲芙蓉花開落  
秋水

綠楊紫燕圖

紫燕雙雙掠水濱  
綠楊嫋嫋不勝春  
朱門華屋知多少  
認得誰家是主人

題畫

渡口漁家對碧峰  
柴門半掩落花風  
釣船日暮不歸去  
只在江南細雨中

明詩綜卷九十